



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 10

Yangia anidakangma :



Tir Yimyim



tirymyim@aolima



tir yimyim

TAPAK 7

Zlatan Ibrahimovic Sweden
squad-i meyipa aruogo

Modi-i CM tem den Covid
atema senden amen



VOL. XVIII NO. 153 (ADOK 153) DIMAPUR

YANGTEPNÜ (THURSDAY)

METSÜREMI (MARCH) 18, 2021

₹ 5.00

COVID-19 Nagaland: Nisung 7 dang anepalur

Kohima, March 17 (TYO): Tanü agi anogo pezübuba Nagaland nung nisung shinga dak-a COVID-19 aliba meputet.

"Bodbarnü nisung shinga dak-a COVID-19 aliba meputet. Külen Kohima nung nisung 7 taneptsü angu" ta Health & Family Welfare Minister, S Pangnyu Phom-i ashi.

Nisung 12,225 rongnungi parnok 11,973 taneptsü nguogo aser tang nisung 7 anepaludar, ta paisa ashi.

"Nagaland nung COVID-19 nungi taneptsü angubaji 97.93% lir. COVID-19 puteter nisung 91 asüba nungi parnok 10 bo tanga timtem ajanga asü aser nisung 154 tashi tanga state temi ogo" ta Health & Family Welfare Director, Dr Denis Hangsing-ia metetdaksü.

Tang anepalurtemji Kohima district nung nisung 6 aser Mokokchung nung ka

lir, ta paisa ashi.

"Nagaland nung COVID-19 alitsü akok ta temolung melemi bilemba sample 1,34,419 tendangogo. RT-PCR ajanga sample 75,289, TrueNat ajanga 37,483 aser Rapid Antigen Test ajanga 21,647 tendang" ta Dr Hangsing-isa metetdaksü.

COVID-19 vaccine dose 63,000 agütsüogo:

Bodbar tashi nung Nagaland nung nisung 49,207 nem COVID-19 vaccine dose 63,000 agütsüogo.

"Nagaland nung vaccine agirtem rongnung frontline workers 31,516, healthcare workers 11,435, teintet rogo 5,194 aser arishi küm 45 ser temapur 1,062 lir," ta State Immunization Officer Dr Ritu Thurr-i metetdaksü.

Healthcare workers 6,887 aser frontline workers 6,906-i COVID-19 vaccine dose anaprong agiogo, ta Dr Thurr-isa ashi.

ILP/RIIN indang rally nung shilem agitsü ayongzüker: JCPI

Dimapur, March 17 (TYO): March 12, 2021 nü kin hohotem aser Civil society telok balala den senden amendang ozüngi melaba ama rally ka agitsü aser Kohima o Dimapur nung DC tem ajanga tezüluba agütsütsü telemteba agiogo ta JCPI-i tanü metetdaksü.

Tanga district tem nung pei pei kin hohotemia DC tem ajanga Nagaland sorkar dangi shidi zülutsü mepishir, ta parnokisa ashi.

"Dimapur nung amenoka aliba kin teloktem aser CSOs-i March 19, 2021 anepdang 10:00 ako nung pei pei teshimtet nübotem DC Court junction-i yoktsü mepishir" ta JCPI Convenor, Atomi Swu aser Secretary

Tia Longchar nati sangdong ka nung ashi.

Dimapur nung Deputy Commissioner indang Office-i aoba sülen sorkar dangi züluba shidi ka agütsütsü. Anungji kin tulu ajaki nübo 200 bosa yoktsü mepishir. Maneni, Naga Tribal Union Chumokedima Town (NTUCT)-ia nübo 200 yoktsü mepir, ta tenatisa metetdaksüogo.

Tanüngba kintem aser CSOs-ia nübo 50 bosa yoktsü mepishir. Iba sentong nung pei pei sobaliba sübotsür agir aden nung ajungtsü aser Nagaland sensotemia iba tongtipang sentong nung adentsü mepishia metetdaksür, ta Atomi Swu aser Tia Longchar nati ashi.

Tan ita Bodbar aser Honibar ajak 'transaction days' asütsü

Dimapur, March 17 (TYO): Financial year 2020-21 tembangtsü atema anogo ishika dang lia sorkar maparen nung tetsükdaksü melii inyaksü atema Finance Department-i Bodbar aser Honibar ajak 'transaction days' ta metetdaksüogo.

Shitakba agibo Bodbar aser Honibar ya 'non-transaction days' lir saka March 17, 20, 24 aser 31, 2021 anogotem nung State Treasury aser Bank ajak nung 'transaction days' asütsü, ta Finance Department-isa metetdaksü.

Foothill Road atema NDPP-i HPC tentetogo



March 16, 2021 nü NDPP indang High Power Committee ka den NFHRCC aser bangdak department nungi ketdangsürtemi Doyang Bridge, Foot Hill Road semdangdang agiba noksa ka angur.

Dimapur, March 17 (TYO): Foothill Road ta nüngtugu süa ajaba Trans Nagaland Highway ya Naga nungertemi mapang talangka nungi aginüa arur. Nagaland nung Dimapur nung dang airport ka dang lir aser ano Dimapur-i kilometre ishikati Assam den railway line agi sendaktepa lir, ta NDPP Media & Communication Committee-i sangdong ka nung metetdaksü.

Nagaland nung gari lenmang tajung agi sendakteptsüla aser iba nung Trans Nagaland Highway ya kanga tongtipang kümogo. Iba lenmang ajanga state ajunga nung kongshir aser nübortem taginüba angateta NDPP-i iba mapatong asoshi luden ka tentetogo, ta parnokisa ashi.

NDPP indang High Power Committee ka den NFHRCC aser bangdak department nungi

Executive Engineer (R&B) Dimapur Division-i anir ketdangsürtemi March 16, 2021 nü Doyang Bridge, Foot Hill Road semdangdang.

Tizit aser Niuland kübok tesem ana nung dak alaka tanga tesem ajak nung road cutting tembangogo ta osang angazükogo aser ano apu 70.66% renemogo. Iba mapa tajung nung sendaktepa alir ajaki akokba tashi meranga inyakba angashia NDPP indang HPC-i pelaba metetdaksü.

HPC-isa telok balalai tebilemtsü lemsatepba angaogo aser iba tongtipang mapa nung shilem agir ajak dang pelaba shiogo, ta NDPP Media & Communication Committee sangdong nungsa ashi.

NDPP-i state renlokdaaksütsü atema nangzüka aliba ama

inyaksü aser state sorkar aser India sorkar dang iba mapatong asoshi temolung agüja linük atema tongtipang mapatong ka ama züngoka inyaksü ayongzüksü, ta NDPP Media & Communication Committee sangdong nungsa ashi.

HPC nung Working President NDPP Alemtemshi Jamir-i anir Sr. Vice President NDPP Chuba Chang, General Secretary NDPP Obed Quinker, Convener CPC NDPP Nungsang Aier aser Secretary, Media & Communication, NDPP David Neikha nungertem liasü.

Külen, NFHRCC telok nung Convener Supulepden Jamir, President Samuel Ovung-i anir Ralan Area Lotha Hoho aser Joint Secretary, James Tungoe-i anir Lotha Lower Range Public Organization züngsemtem aden.

Olemtep tembanger süra yimten latettsüla: NPCC

Dimapur, March 17 (TYO): Naga yimten atema telemteba ka agibaji tanga state tem nungbo mamshitetsü aser Framework Agreement o Agreed Position ajanga Nagaland nung aliba Naga nungertemi atema telemteba agitsü sayur, ta Nagaland Pradesh Congress Committee (NPCC)-i metetdaksüogo.

"NPCC-i India sorkar den olemtep nung maden anungji olemtep nung adenba teloktemi dang ibaji jungjunga meteta alitsü. NSCN (IM)-i küm 24 tashi yimten yakta latettsü ta nangzüka arur. Ajak atema mapang ka lir aser yimten melatetba ajanga 'One Govt One Tax' paidoker. Küm 24 tashi aremzüka aruogo aser joko yimten latettsüla. State sorkar yimten melatettsü atema takhangba agütsür anungji BJP sorkari state sorkar medeni yimten latettsü asütsü akok ta bilemer," ta NPCC president K. Therie-i sangdong ka nung ashi.

Küm aika Framework Agreement miimbanga ayu aser August 19, 2019 nü Parliamentary Standing Committee on Union Home

Affairs-i Parliament nung 213buba Report benokdanga iba ya metet. Iba nung Union of India kübok telemteba agitsü aser arrtsü memelenshitsü ta shia lir aser rongsenkettsüng teyari tulu agütsütsü shidanga lir. Anungji, Parliament nung ashiba nung 'Sovereignty & Integration' maden. Ibaji shitak mesüra NSCN(IM)-i iba onük jembitsüla. NSCN(IM)-i India sorkar tsübuba atema Framework Agreement maneni pusemer saka parnoki Parliament indang Standing Committee dang kecha masüngdangteter, ta K Therie-isa ashi.

Sovereignty aser Integration mali nung kechiba Nagaland nung alirtem timtemtsü. Nübertemi mapang talangka 'One Government One Tax' takhangba agüja arur. Anungji NSCN(IM)-i Framework Agreement ajanga nübertem manisatsüla, ta NPCC president-isa metetdaksüogo.

Nagaland nung tongti shilem agirtemi Interlocutor dang kechi agizükettsü ta asüba metetdaksüogo. Nagaland Governor-i Nagaland atema

olemtep tembangogo ta sangoktsüogo. Anungji iba tebilemtsü onük nung densema alir ka ama onoki Nagaland asoshi renemba telemteba mapa küm inyaksü akhangar, ta paisa ashi.

Nehru-i 16 Point Agreement molunga agizükba aser Arrla 371(A) agüja state kümdaktsüba atema Congress-i pa dang pelar. Plebiscite nung shilem agirtemi putiotsü atema jembitsü temeten lir aser 1964 peace talks aser ano 1977 ceasefire agreement sülen adenertemi putiotsü yanglushitsü mapang menuadokogo, ta Therie-isa metetdaksü.

9 Point Agreement, 16 Point Agreement aser Shillong Accord ajanga yimtenren aser r o n g s e n k e t t s ü n g tenangzükbatem agütsüogo. Framework Agreement ajanga 16 Point Agreement jenjang agizükogo. Iba nung yimtenren mesüra rongsenkettsüng tenangzüka kecha mali, saka iba dak sendakba kar enoka lira onoki olemteptsü molunga lir, ta NPCC president K Therie-isa metetdaksüogo.

Japukong nung Augmentation of Water Supply project commission süogo



Mokokchung district kübok Yajang C yimtsüng nung March 16, 2021 nü 'Augmentation of Water Supply to five villages in Japukong Range' commission asüba sülen tangokba noksa ka nung Minister PHED Jacob Zhimomi den Minister Temjen Imna Along, Advisor Kazheto Kinimi aser yimtsüng pongu putu menden züngsemtem angur.

Dimapur, Metsüremi/March 17 (TYO): Ato Kilonser Narendra Modi lenisüba kübok nukla tajung yur state nung aliba yimtsüng ajunga nung kilen shia Individual household tap connection (FHTC) ajanga tzü tajung agütsütsü sentong lir, ta Minister, PHED Jacob Zhimomi-i Mongulbarnü sangdong. Iba scheme ya flagship programme Jal Jeevan Mission (JJM) ajanga tenzükba lir.

Japukong nung aliba yimtsüng pongu nem 'Augmentation of Water Supply' project commission sütsüba mapang minister Jacob Zhimomi-i ashiba agi, Mokokchung district nung Department ajanga JJM scheme ya phase yimya nung mapa kuma inyaka aor.

Iba dak sendakba nung

minister-i nüburtem dang shilem tajung agia department yaritsü ajungshi, kechiaser nüburtemi shilem magira mapa nung takok mangutsü.

District headquarters nung lenmang sendaktepba terenemleni arur asünung state sorkari tanünga Sub-Division nung lenmang tesendaktep maparen tenzüksü sentong lir, ta pai ashi.

Iba sentong nung Minister, Higher Education & Tribal Affairs, Temjen Imna Along-ia jembia liasü. Taoba parliamentary secretary Dr. Benjongliba Aier mapang nüburtem nung tajemtsü tzü peria agütsütsü maparen ya tenzük aser tanü nüburtem teyaritem nung asangsang kümogo, ta pai ashi.

Iba project mapang shidak

nung renemtetba asoshia pai maneni Minister Jacob Zhimomi nem tenüngsang agüja liasü.

"Augmentation of Water Supply Scheme through stream Water source to five villages in Japukong Range, Mokokchung" indang project ya North Eastern Council (NEC) ajanga sen teyari agüja 2014 küm tenzük aser 2020 nung renem.

Yajang A, Yajang C, Liremen, Akumen aser Tzuremen yimtsüngtem nung yimtsüng anasa aliba ayong nungi tajemtsü tzü agütsütsü asoshi sen lakh 484.74 indoka iba mapa ya inyaka liasü.

Iba project ya Yajang C nung Minister Temjen Imna Along, Advisor Kazheto Kinimi, Chief Engineer PHED aser yimtsüng pongu nungi putu menden lia commission süogo.

METETDAKTSÜR

Tuensang Town Ao Baptist Arogo Golden Jubilee planning committee ajanga osang ka metetdaksür.

Asenoki toktsür aoba arogo taruba küm 2022 nung Hon Jubilee amongtsü sarasadema renema lir. Iba den sentakba nung taküm küm 2021 Arogo golden jubilee omen "Jungtepshiba" dak ajemdaker telongjem sarasadem sendong ka Dimapur yimtiba nung alitsü sangdonger. Iba sendong ya 21st March 1:00 ako nung Ao Baptist Arogo Padum pukhri nung akatsü.

Tensa koda masü den pei mapa jenti alitsü saka ibai kü shilem ta tangatetba nung iba sendong nung arua atentsü mepishia ayongzüker.

Dimapur Area Sub-committee tenüng nung

Imkongsua : 9862168434 Imti Jamir : 7005741820
Bendangtoshi : 9612373347 Takukumba : 9436007144

7th Mile Dimapur nung süng arangba mill ka rongdok



Dimapur, Metsüremi/March 17 (TYO): Ashok Leyland Showroom, Dimapur anasa 7th Mile nung March 17, 2021 nikongdang 2:21 ako nung kitsüng kironng lendong adoka lir ta osang aruba den külemi Fire Station Chümoukedima, Fire Station Dimapur (Central) aser Fire Station Dimapur (West) nungi Fire & Emergency Services team tem mi ya remseptsü apusoa ao.

Fire Tender trok den hadir tabensa bener Fire Personnel tem iba mi remseptsü oa liasü.

Iba kitsüng kironng lendong nung sen lakh 25 shi jenjang süng arangba mill ka nung hadir balala, furniture log,

generator aser heat chamber tem rongdoka liasü.

Mapang shidak nung mibeneri telangzüba agütsüba ajanga mi ya azüoktet aser anasa mapa inyaker aliba tesem nung kaoloka aotsü aliba nungi kumzüka liasü.

Sen lakh pongu shi jenjang osettsüset arongtsü aliba nungi kumzüka liasü. Iba mi remseptsü asoshi mibeneri temi ghonda ter agi. Mi ya electrical short circuit nungi adok südi, ta temolung melemi lir aser iba lendong nung asüama meliasü.

Mibenertem ya Duty Commander SI C Baushong Phom, ASI K Hito Zhimomi aser ASI T Jonaba nungertemi anir liasü.

GPRN ajanga asükhü lemsateper

Dimapur, Metsüremi/March 17 (TYO): Maram-Thangal Region kübok Willong Khullen yimtsüng nungi NSCN/GPRN indang Leacy, Ng. Luiying anojungi March 17, 2021 nü asüba osang angashia Government of the People's Republic of Nagalim (GPRN) mang ayimer, ta MIP, NSCN/GPRN sangdong ka ajanga ashi.

Pa ya Naga linük tenzükba wadang nung January 20, 2000 küm tenüng zülüoka liasü.

Pa tasünung tashi linük meimba molungsentsü nung Naga lima tenzükba liasü. Pa asüba ajanga tawa adokba jangja-jangja metettsü aser iba

tawa asüngtsü kanga tasak alitsü. Pai Naga lima asoshi anibelem mesasai tenzükba atema pa tenung Naga nunger puti otsü nung teti alitsü aser Naga lima asoshi bendanga agütsüba ajak molung nung teti alitsü, ta sangdong ajanga ashi.

GPRN ajanga asür Ng. Luiying'er kinunger aser tembartem den asükhü lemsateper aser parnok temang nung tashi aser anisüngzüük molungsentsü agüjang ta sarasademtsür. Maneni asür tanüla teti tatem maka tesunep nung anisüngzüükjang ta sarasademtsür, ta kasa sangdong ajanga ashi.



Dimapur, Metsüremi/March 17 (TYO): Bhagat Stadium, Rangapahar, Dimapur nung March 10 nungi March 17, 2021 anogo tashi Army Recruitment Rally agia liasü. Iba rally ya talisa Nagaland nungi lanurtem aser North Eastern state nungi lanurtem asoshi teshimtet trades kar liasü. Iba rally nung adentsü asoshi candidate 10,500 shi tenüng zülüok aser rally nung candidate 8,000 shi dena liasü.

Iba rally ya Army Recruiting Office Rangapahar ajanga HQ 3 Crops aser Dimapur District Administration teyari nung agia liasü. Nagaland sorkar, Dimapur indang Deputy Commissioner, Commissioner of Police, District Education Office aser Chief Medical Officer teyaritem nung iba rally takok ngua March 17, 2021 nü tembangogo, ta Col Rajesh Mahindrakar, shiba Nagaland nung iba recruitment indang in-charge lir, pai

sangdong ka nung ashi.

COVID-19 tashidak wara liaka Nagaland nungi taoba küm iba rally nung shilem agiba dang nungi taküm kanga agi timba liasü. Candidate temi Indian Army nung adentsü asoshi tejangraba tulu aliba sayua iba rally nung shilem agia liasü.

Shimteta aliba candidate tem atema Common Entrance Exam (CEE) ya April 25, 2021 nü Rangapahar Military Station, Dimapur nung agitsü.



Arunachal Pradesh nung aliba Pasighat outdoor stadium nung Special Secretary of Secondary Education & IT, Shashwat Sourabh-i physical education (PE) tesayurtem atema state-level refresher training programme tenzüksüadang agiba noksa angur.

NGO temi political party tem dang 'mental health' enoksemtsü ayongzüker

Mangaldai, March 17 (Agencies): Darrang aser Udalguri district tem nung non-governmental organizations (NGOs) aikati Assam Assembly elections nung toktepba political party tem dang parnok manifesto tem nung mental health dendaktsütsü ayongzüko.

Iba District ana nung April 1, 2021 nü polling asütsü.

Assam Assembly tanabuba shilem atema nomination asüba anogoji tanü tatembang liasü.

"Assam nung tekolok nung timtem adokba tebilemtsü tuluba akümer aser policy makers-i iba atema mebilemba atema sasar" ta Journalists' Association of Assam, general secretary Narayan Deka-i ashi.

District ana kübok primary health centre tem nung Psychiatrist ka, paramedical staff asembosa aser mozü supply shitak alitsüla, ta parnokisa takhangba agütsü.

Parnokisa district hospital ajak nung tekolok nung timtem alirtem atema ward balala

ayutsü aser psychiatrist 3 den paramedical staff peria ayutsü takhangba agütsüo.

"Darrang district hospital nung nütsüng yongsük lakh 10 anepalutsü atema psychiatrist ana dang lir. Department nem mozütem tanga department ama magütsür aser National Health Mission kübok alir" ta village-level mental health committee president Chandra Kanta Nath-i ashi.

"Iba ajanga kümshia mozü alidang ita ana jungnüa agir" ta Nath-isa ashi.

Manipur nung BSF jawan kibong nem Rs 5 lakh agütsü

Guwahati, March 17 (Agencies): Bodbarnü Manipur sorkari Border Security Force (BSF) jawan Paotinsat Guite'er kibong nem Rs 5 lakh teyari agütsüo.

Yaküm December ita Jammu & Kashmir kübok Line of Control (LOC) anasa pa khaset.

Tanü Imphal nung Manipur chief minister Biren Singh-i

Guite'er kibong nem 'Major Laishram Jyotin Singh Ex-Gratia Scheme' kübok senji agütsü.

Guite ji BSF nung sub-inspector liasü aser Poonch district kübok Rajouri sector nung BSF indang FDL mapa lemezükja liasü.

Poonch district kübok LOC anasa Pakistan sepaitemi ceasefire alema injang agi BSF

sepai khaset.

Pa ya Senapati district kübok Maphou Kuki yimtsüng nungi liasü.

"BSF Director-General Rakesh Asthana-i kü den office nung ajuritep. Ni pa lia 'Major Laishram Jyotin Singh Ex-Gratia Scheme' kübok Rs. 5 lakh indang cheque agütsüo" ta Biren Singh-i metetdaksü.

Meghalaya nung health centre tajungba kümdaktsür



Bodbarnü Meghalaya chief minister Conrad Sangma-i Mawryngkneng nung CHC yanglutsü atema lung azüngtsüadang agiba noksa angur.

Shillong, March 17 (Agencies): Meghalaya health department-i health facility aika ajungketogo.

East Khasi Hills district kübok Mawryngkneng nung health department-i public health centre (PHC) nungi community health centre (CHC) ajungkettsü.

Bodbarnü Meghalaya chief minister Conrad Sangma-i

Mawryngkneng nung CHC yanglutsü atema lung azüngtsüo.

Tawa tu Meghalaya nung State Health Policy ka renemogo aser iba ajanga healthcare system nung prevention, curative aser enabling aspects nung temolung agütsür.

"Mawryngkneng PHC nungi CHC akümtgsü atema

lung azüngtsüo. MDA sorkari teti nübortem atema bilemtsür aser onok inyakyim nung health tongtipangba lir. Onoki iba ya nübortem nem bendanga agütsür" ta Conrad Sangma-i tanü metetdaksü.

Meghalaya sorkarisa mapang shitak nung healthcare mapa inyaktsü atema artificial intelligence aser technology amshitsü sentong lir.

Tripura ADC election nung candidate 181 tokteptsü

Agartala, March 17 (Agencies): Tripura autonomous district council (ADC) election atema candidate pezü indang nomination magizükba sülen candidate 181 kümogo.

ADC election atema candidate ajak agi parnok 185-i tenüng agüja liasü. Hombarnü nomination papers reprangdang candidate 4 indang magizük.

Election ketdangsürtemi CPI(M) candidate ka, Congress candidate ka aser Janata Dal (United) candidate ana indang nomination papers magizük.

Tripura ADC elections nung BJP candidate 14, IPFT 17, CPI (M) 28, Congress 28, INPT 5, tanga party balala nungi 30 aser independent 59

tokteptsü.

Ompinagar ADC constituency nung candidate timba lir aser iba constituency nung candidate ajak agi 11 lir.

Maneni, Raimavelly constituency nungi candidate 9 aser Kanthalia-Mirza-Rajapur constituency nungi candidate 8 lir.

Constituency aika nung BJP candidate temi independent ama tenüng agütsüo. BJP-i IPFT den tesentaktep ayuba anema parnoki iba mapa ya inyakogo.

Ajisüaka, BJP lennir tejentemi temolung masüba candidate tem dang nomination meyipa agitsü mesüzüker. ADC election ya April 6 nü menden 28 nung agitsü aser April 10, 2021 nü votes azüngtsü.

ULFA (I)-i Modi dang tatok meshitsü akhanger

Guwahati, March 17 (Agencies): Prime Minister Narendra Modi-i putu 17 puba Ahom general Lachit Borphukan dang nüjiso rarar ta jaloktsüba atema United Liberation From of Asom (Independent)-i PM Modi dang Assam nunger dang takok meshitsü shiogo.

"Iba ya putiotsü melenshitsü merangba lir. Nazi nungeri European putiotsü melenshiba mesüka lir. Prime minister-i jembibaji tai aser Assam nunger mezügmeshiogo. Anungji Assam nunger tenüng nung onoki pa dang tatok meshitsü akhanger" ta ULFA (I) publicity cell member K Rumel Axom-i ashi.

March 12 nü India nüjiso

ngur küm 75 ajungba tenüng nung Modi-i 'Azadi ka Amrit Mahotsav' tenzüksüadang nüjiso atema rarartem rongnung Borphukan tenüng tetshi.

Lachit Borphukan-i 1671 küm Battle of Saraighat nung Ahom nunger len anir Mughal nunger anema rara. Battle of Saraighat ya ayong nung raraba tulutiba liasü.

India nüjiso atema mapa metenzük dang putu ana tejaklen April 1672 nung Borphukan asü.

Iba onük jembiba atema nisung aikati Modi aitsüo. Külen opposition party aikati election nüboyimba sentongtem nung prime minister-i iba onük tai jembiba atema lutsür.

Avadh-Assam Express nung taila sen crore 1 tema angu

Jorhat, March 17 (Agencies): Assam kübok Mariani nung Railway Police Force (RPF) sepaitemi Rs 2000 aser Rs 500 indang taila sen aika ngutetogo.

Avadh-Assam Express nungi sepaitemi taila sen crore 1.16 crore tema ngutet.

Sub-Inspector/RPF/Mariani P.K. Bishnu aser Bijoy Kumar Chanda nati train indang S-1 takdang nung yangkhu ka

nung taila senji angu.

Anepdang 11:30 ako meta Avadh-Assam Express Mariani tonga aru aser ketdangsürtemi yangkhuji agizük aser RPF post Mariani-i bener ao, ta Northeast Railway Frontier (NFR)-i metetdaksü.

Iba yangkhu nung kombola ka nung fake currency notes (FICN) aleper bena aliba ngutet ta osang ashi.

Arunachal nung NSCN (R) züngsem ka khaset

Itanagar, March 17 (Agencies): March 16, 2021 nü Arunachal Pradesh kübok Changlang district nung Assam Rifles sepaitemi NSCN (R) züngsem ka khaset.

NSCN züngsemji Kappan Ngemu ta jangjaogo aser pa Yatdam circle kübok Motong

nunger liasü.

Osang angazükba agi telungpurtemi mezügmeshiogo sepaitem dak injang khaloktsü aser idangji telungpur ka khaset. "Pa ket nungi AK-47 rifle ka aser injang 17 ngutetogo" ta Changlang SP Mihin Gambo-ia ashi.



TIR YIMYIM

YIMOBILEM (EDITORIAL)

DIMAPUR YANGTEPNÜ, METSÜREMI(MARCH) 18, 2021

NCT BILL, 2021

March 15 nü Lok Sabha nung Centre sorkari benokba Bill- National Capital Territory of Delhi (Amendment) Bill, 2021 (NCT Bill) ya agizüka ozüing kümra Delhi LG nem tashi tulu agütsütsü aser nüburtemi shimtetba Delhi sorkar dak tashi malitsü, ibayongji tang Delhi nung AAP-i iba bill anema longkak aiter. Delhi nung Chief Minister, Arvind Kejriwal-i aniba AAP sorkari timtem ajangshiba ama sorkar balalai timtem ajangshia malitsü südi, kechiyong 2015 küm nungi tenzüka Delhi nung LG aser sorkar na tsüingda mangatettep aiben adoka arur. Ibaji dang masü saka Modi-i aniba sorkar aser Kejriwal-i aniba sorkar na kati ka aitsütepa arur. BJP-i Kejriwal ya tiyazü jembir ka aser pai mapa majeter ta aija arur, ajisüaka Kejriwal-i kanga junga inyakba agi linük nung kanga nüngtugu kümogo aser assembly election ana tashi nung pai aniba party-i BJP kanga mejungi tamakok ngudaktsüogo. Tang Centre sorkari LG (lieutenant governor) nem tashi tuluba agütsütsü atema Parliament nung Bill benoker aser iba ya agizüka ozüing kümra Kejriwal ya tenüing agidang chief minister asütsü, kechiyong pa dak tashi tulu malitsü. Iba Bill ya agizükra Delhi nung asalentong balala yanglua inyaksü atema sorkari tamasa LG den asüingdangteptsü aser yimsüsübaren atema sorkar ozüing yanglutsü memelatsü. Iba Bill benokba sülen Kejriwal-i, nüburtemi shimtetba Delhi sorkar tashi ajak agientsü atema BJP-i inyaker, ta aitsüogo. 2018 küm July ita nung Supreme Court-i, Delhi sorkari agiba telemtetba ajak nung LG-i amoushitsü makok, ta obendang agüja liasü. Kejriwal-i, "Iba Bill-i yamai ashir, Delhi atema sorkar tetezü LG, süra nüburtemi shimtetba sorkari kechi inyaksü? File ajak LG ket-i aotsü. Iba ya 2018 küm July 4 nü Constitution Bench-i agütsüba obendang anema lir, kechiyong file temji LG nem magütsütsü, telemtetba ajak sorkari agitsü aser telemtetbatemji LG nem agütsütsü atema obendang agüja liasü," ta metetdaksü. 2015 küm menden 70 aliba Delhi assembly election nung Kejriwal-i menden 67 angu aser Modi-i aniba BJP-i menden 3 dang angu; ibaji Modiatema mezüngbuba tamakok chidangba amai liasü, kechiyong 2014 küm nungbo Modi-i aniba party-i Lok Sabha election nung dang masü saka Haryana, Maharashtra, Jharkhand aser Jammu & Kashmir elections nunga takok ngua liasü. Iba sülen Modi-i aniba sorkari Delhi sorkar ket nungi anti-corruption bureau agi aser service department naprongla rakzükogo. Centre sorkari Chief Minister Office mita ao aser principal secretary apu, iba dak alia AAP MLA ter dak tema nem tai tonglokja pua liasü. Tesülen Delhi High Court-i LG ji Delhi cabinet kübok inyaksü makok ta obendang agütsü, ajisüaka Supreme Court-i law & order, police aser ali dak alaka tanga lenla nung LG dak tashi mali ta obendang agütsü. Taoba election nunga Modi aser Shah nati kanga meranga inyakaka BJP-i tamakok mejungi angu, ibayongji Centre-i Kejriwal arishir asütsüa akok südi ta bilemer. Delhi Chief Minister masü saka LG nem dang tashi tuluba agütsüra ibajibo nüburtemi ashioktsüba mapa ka asütsü, kechiyong Chief Minister aser MLA temji nüburtemi shim.

OLEMSABANG

YA SHINER

T.LIMA TZÜWAR, UNGMA IMPANG, ARTANG WARD

Akhümtsüba aliba Minister, MLA tem, Office aser yimtsüing Town balala nung yimsüsür tajungtem aser nütsüing nübur amangbapurtem, oda asenok dak tajung kecha mali, asenoki tebang agi o tajung jenti jembir saka asen mulungjang agibo Tsüingremi aginütsüsa aser Pa pelatsüsa kecha meinyakteter aser mebenshir. Kechiyong asenok meimchir taküm ya pei pei kibong asoshi rongsen penbudang aser bilemdang memeteti Tsüingrem jashitsüsa mapatem inyaksar alir, asenoki temenen tatidang mekokteti ochi mashi inyaker aser benshir. Aji saka asen Teyanglur Tsüingremsa temeim tuluba asüning asen sarasadem langzüa alima rangben tashidak wara nungi taneptsü jenti ngua arudagi, ya asoshi Pa tenüing asanger. Iba den külemi kija aser lokti kwikati pei mapa yutsü nübur timtem reprangteta anibelem arema nübur anepalur, nenok dang kanga pelar aser tenüing asanger Tulusang Tsüingremi tali moajangma, ano maneni nenok nungi teimla akar, amangbapurtem ajaki parnok asoshi maneni sarasademtsüdi.

Temeim yimsüsür tajungtem, na khristan lima nung yimsüser ka ama ochishia aser nübur meima yimsü asütsü mepishir. Radio aser osang kakat nungbo center Govt. nungi terenlok asoshi sen coresa core yokba ashir, item apibo asen khristan lima nung lemangtem ya ajaklen sentsüperanga yangluteter alitsüba aser aonunga kinük ajaklen light agi anüingdang ama sangwa dang alitsüba süning ya koda asü, ya nenok tarutsü election atema rizünger asü mesüra nüchiso bushir teloki meshir kanga süngmanga bilemer. Nenok Minister MLA temi asen Naga lima ya meima lira lenmangtem ya repranga senzü nungbo ajungtsü. Temeim asen chirnurtem kaketshirtem kidang nungibo süoshi temerük sübur aor saka school nungi shilangdangbo süoshi aser pei temang ajak aoyi agi sünger nisungbo memesük kümer shilanger, anungji meyi mapang marudangsa lenmangtem ya repranga yanglutsü nungbo kanga ajungtsü. Ajaki pei agitsü dang mebilemi Tsüingrem akhüm tsüba aser nübur meima alitsüla.

MEDONGSHITSÜR

AO KIN NUNG TELOK PALALA NUNG RONGNIRTEMI (SENSO) ASER (LOKDI) OLONG ANA TETEZU MEMETET ZÜLUSAR.

(K. Lima Longkumer.)

ADOK 12-03-2021 NUNG

Tai Süning shidak ama amshiba olongtem

1. Rongsenkütsüing (Tsüingdenba masü)
2. Bushisungdang
3. Kakat Riju
4. Ninok /Linok (Sickle)
5. Menoknok (Earthquake)/Tütüzü madoker.
6. Anogo
7. Lung (Rock) ABAM-i Laishiba aser Khün kaküt nung lung ta tang zülua amshidar
8. Joko (Karibo Jiko ta amshir)

ADOK 13-03-2021 NUNG

9. Tsükong ('S' jagi kechi tütüzü sayur)
10. Prangbong
11. Sendong (Programme)
12. Sentong (Capital)
13. Tapet (Aor-i amshiba rongnung iba Olong ya tütüzü mashilen amshir).
14. Ken (Song)
15. Ken
16. Mepet (Cloud)

Shidakba olong aser tütüzü kütta

Rongsenkütsüing(Meranga, inyakka Züingzünga rizüingba agi takar akümer. Bushitsüingdang (Tsüingsü abu) Kaküt Ruju (Aruju) Lunok(Ya ake tsürabori jempiba) Mulunok (Ya ake tsürabor-i jempiba) Ya tütüzü shidak jempiba lir. Anügo (Anü adok ashe Ano adokba nibo mangu. Long (Longtrok/Longpok/Longjakrep) /Longkümer /Longchar / Longkong Vill /Longsemdang Vill/Longsa Vill (Ao) / Longsa Vill (Lotha)/Longkipe Vill (Sangtam).Yamaji asen Aori dang masu saka danger kin ia long dangji long ta zulur. Jogo ('K' masü 'G' agi melenang)

Tzükong (Tzü ayong agi ladang/kongdang iba jagi tzükong ta ajar. Merangbong Sentong (Programme) Sendong (Capital) Tapüp

Khün (E ya Ao Alphabet nung olasü koma adoker yamaji olaji adokdi süra ajak shidak asütsü . Kün (Kün atema/For a short time or period) Mapüt (Laishiba aser khün kakut nung mepet ta dang amshidar.

Item olong ajak tütüzüji metütnüra asüingdangra pelashisha sayutsu .

"Medongshitsür ashe Tartsür masü"

Mobile Number -9402867797

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Tasü Tzüyim lungki nung Zekaria kaket nungi tapak aika angu



Tawa Israel nunger Archaeologist temi Tasü Tzüyim lungki nung ngutetba osettem- Zekaria kaket nungi tapak teshisa, molok tejentiba, nisung-ret aser ali chipo kar noksa nung angur.

March 17, 2021: Israel nung Archaeologist temi Tasü Tzüyim lungki nung Zekaria kaket nungi tapak aika angu aser item tapak rongnung kabo Zekaria 8:16-18 tekong densema lir.

Archaeologist temisa molok tejentiba, nisung-ret aser ali chipo kar angu.

Zekaria 8:16-18 tekong nung yamai zülua lir, "Itimi nenoki inyaktsüba mapa lir; nenok nisung shiai pei kiyonger den atangji jembiang; nenok amung nung atangji aser tesünep obendangba inyakang: aser nenok shingaia pei kiyonger anema temelungjang nung tamajung teshisa aser tiyazü züngia-züngko tesü, kechiyong Ni sempaba item mapa ajak lir, ta temeranger Kibubai ashir."

Auertemi akhidang nungi

aliba osettemji mauyadang parnoki tama ali tua bendantsü atema parnoki Tsü Tzüyim nung aliba longkiji tua liasü.

Israel Antiquities Authority tongti, Israel Hasson-i, "Auer ket nungi item akhi senti osettem kümzüka ayutsü nükjidong nung onoki iba mapatong inyak. Tang Laishiba nungi kaket tejentem anguba ya ajanga linük asüngsashitsüla," ta metetdaksü.

"Akhidang nungi aliba senti osettem tekaraba nung bushia kümzüka ayutsü atema senotsü lemozüksütsüla. Iba lungki nung aliba osangtem ajak bendantsüla. Karbo kanga senti asütsü," ta paisa metetdaksü.

Laishiba kakettem dak alia Israel nunger archaeologist temisa küm 10,500 temalen

yangluba tatakba molok ka aser küm 6,000 dak tema indang nisung-ret ka angu.

Israel Antiquities Authority-i Archaeology Department of the Civil Administration den senteper iba mapatong inyaka liasü aser iba maparen inyaksü atema senotsüji Ministry of Jerusalem Affairs & Heritage-i lemozüksü.

Mapang shia auertemi akhidang indang senti osettem auyaa black market nung ayoker, aser iba dak sendakba nung Israel Antiquities Authority tongti Hasson-i, "Onoki senti oset auyartem küm aika arrshir saka meputeter, anungji auertemi mauyadang onoki tama item senti oset bendantsü atema telemtetba agi liasü," ta metetdaksü.

Georgia nung pastor, Kevin Nick khaset



Pastor, Kevin D. Nick

March 17, 2021: Georgia nung Higher Dimensions Arogo nung pastor aser Higher Dimensions Fellowship Assemblies tentetsang, Kevin D. Nick arrshi küm 43 ajungba sülen hopta asem shi dang lirbo nisung kari pa khasetogo.

Police-i ashiba agi, March 12 aonung 7:30 ako meta Decatur kiyong kübok Sherwood Avenue nung aliba ki ka anasa injang ola angashiba sülen police officer tem iba tesem jagi ao.

Ketdangsertemi süngdong ana tsüngda Dodge Durango gari raksar angu aser gari telung nungji Nick injang agi yirur lia angu.

Tenük kuli alirtemi ashiba agi, sedan gari tanak ana nung nisung pezü mener aruba sülen parnok rongnung kati pastor Nick dak injang khaloktsü; gari ana nungjagi ka nungi nisung ka ayazüka aluba sülen Nick indang gari tashi ao aser gari anisang dang nü tenüng "Terrance" asü? ta asüngdanga liasü.

Pastor khasetba ken o dak sendakba nung arrshi küm 16 tebur kabo puogo.

Osangbener den jembidang DeKalb County Police Department nung Investigator kati, iba tatalokba ya tang tebushidak lir anungji osang tejangja magütsütettsü, ta metetdaksü.

Social media nung nüngtugu, William G. McCray III-i facebook post ka ajanga, Nick ya pa tembar tajung ka liasü aser pa dak injang pezü khaloktsür liasü, ta metetdaksü.

Honibarnü Arogo nung Adjutant General, Tremaine Dupree-i facebook post ka ajanga Nick asüba osang sangdong.

"Nick'er kibong, Higher Dimensions Church International aser Higher

Dimension Fellowship Assemblies-i tejashi nung tongti tesayur, Kevin D. Nick D.D asüba osang sangdonger. Onoki mangyimer, ajisüaka pa Tsüngrem den tesünep nung lir ta meteta onoki pelar," ta Arogoi metetdaksü.

"Tesayur Nick-i ministry mapa inyakba mapang piyong pai taochi aser temeim agi inyak. Pa ajanga pei taküm nung kongshiba nisung ajaki pa kanga menungratsü," ta Arogoisa metetdaksü.

February 22, 2021 nü Nick-i pa arrshi küm 43 ajungba tasoba anogomong benjung monga liasü aser alizüng ka tongtetdaksüba atema pai Tsüngrem nem tenüngsang agüja liasü.

Pa asoba anogomong nung pai facebook ajanga, "Tanü ni arrshi küm 43 jungogo! Ni taküm anema yutsüba atema Tsüngrem dang pelar! Ministry mapa atema Vegas-i arur mapang talangka masü aser tang tashi ni Arogo yangerba aser tenyaba mapa inyakdar, kechiyong kü taküm ya Pa meyong. Kü den salem osang lemsatepba, phone ajanga jembiba, post asüba atema ajak dang pelar," ta lemsatepa liasü.

ANOGO ABEN TSÜNGREM DEN

TOMA-I DANG YISU ZÜBU ANGATET

"Idangji pai Toma dang ashi, yangi ne temeyong asenokang aser kü tekabu ajiang, aser ne teka songtoka kü tesa nung amuokang; aser mamangi teli, saka amangang." (Yohan 20:27)

Laishiba nung Yisu nütsüng rongnung Toma shibai dang "Terata Toma" (Doubting Thomas) ta laishiri tenüng jaloktsür, pai Yisu shia aruba nung rata-a alibaji tamang makatetba tanela ka ama züngshir. Saka Laishiba nung jungjunga reprangdangra Toma-i dang masü, saka nütsüngtemia Yisu shia aruba meprangteti liasü. Mary Magdala-ia Yisu-ji atsüki anüker ka ama bilem, kari tasüba nungi shia arutsüla ta laishiba nung ashiba mangatet, Emmaus lenmang nunga nütsüngtem kari Yisu mereprangtet. Anungji kari mangatet, kari meprangtet, aser kar rata-a liasü. Saka Toma-ji dang aija bilemer. Toma-i rata bilembaji ranglok balaka nungi bushidangra ochiba nung tamang makatetba masü, saka ochibaji tajangja nung angatetnüa aliba angateter. Pa emotional tamanger ka masü, saka amangli amangerbo tangatetba aser kuli lia tamanger ka sünü. Tangar nütsüng shingaia Yisu zübu indang shishia maliasü, saka Tomai dang Yisu kangki nung timtemba aser temang nung zübu nungji kongshidangnüa liasü. Toma-i dang asen menen tarakji angatet. Yisu zübu indang naia shishia bilemdangang.

SARASADEM

Kibuba Yisu, na onok menen yong ne temang nung zübu aket. Onoki shishia mebilemer, saka Toma-i ne zübu nung kongshidang pai iba zübu nükjidong angatet. Iba zübu ajanga onok aneptsü. Amen

Khristantemi mepishiba sülen EC-i Tripura ADC election anogo melenshi

March 17, 2021: Tripura Tribal Areas Autonomous District Council election April 4 agitsü liasü saka iba anogoji Easter Sunday asüba agi anogo atsülanga April 6 nü ang agitsü lemtetogo.

State Election Commission-i sangdong ka ajanga, state nung Khristan organisations aikati mepishiba nung ajemdaker ADC election agitsü anogo atsülangogo, ta metetdaksü.

State election commission-isa, Khristantemi mepishibaji agizüka April 4 nü masü saka April 6 nü ang election agitsü, ta metetdaksü.

Election votes-a April 8 nü masü saka April 10 nü ang zünga election osang sangdongtsü.

Ajisüaka election jakdang election dak sendakba sentongtembo mezüng sangdongba ama kasa asütsü aser ADC council tasenbaji April 16 matongdangsa tentettsü, ta state election commission sangdong ajangasa metetdaksü.

"April 4 nü vote agütsütsüji nisung aika atema timtem lir, kechiyong parnok atema Easter Sunday anogo ya kanga tongtibang anogo ka lir," ta sangdong nung shia lir.

Harry Connick Jr.-i Khrista osangtajung kensep ka sayatsü

March 16, 2021: Osangtajung kentener, Harry Connick Jr.-i osangtajung kensep 'Alone with My Faith' kensep sayatsü; iba kensep nung aliba ken ajak pai mejem, pai aten aser paisa record asü.

"Iba project inyaksü atema ni mapang talangka nungi bilema liasü aser iba kensep nung nisung ajaki meteta aliba kentem züngsemtsü ni bilema liasü saka ni züluba kentem ang inokogo," ta pai metetdaksü.

"Iba kensep nung ni züluba kentem keta lir aser ken karbo kü tamang jenjang indang densema lir," ta pai metetdaksü.

Interview ka nung

jembidang Connick-i, lar jalai kensep indang cover ji design sütsü aser iba kensep nung Amazing Grace ken video-a lar jalaisa direct asü, ta metetdaksü.

Iba kensep ajanga tanela ajungkettsütsü aser item ken angartemi teimla angutsü nükjidong nung pai iba kensep adok, ta pai metetdaksü.

Iba kenep ya Khristantemi dang masü saka Khristan yimsü mamangertemia angatettsü, ta shia pai, "Ni Khristan ka aser kü tamangba yimsü atema ni nüma atanger, ajisüaka iba lima ya kanga tulu aser yangi nisung jenti lir," ta ashi.

OLONG PAITEP # 5756

1			2			3		4		
					5					
		6								
							7			
		8								
9										10
				11		12				
13										
14						15				

TIPIEN

1. Chiyungtsü oksa

- (5)

3. Tatalokbatem

- (5)

5. Tama

- (6)

6. Pei meyong aküm

- (3)

7. _ _ _ _ bang

- (4)

8. Kinungpurtem

- (7)

9. Nokdak masü

- (4)

12. _ _ _ la

- (3)

13. Ochi masü

- (6)

14. Yagi Sü ataker

- (5)

15. Temadok

- (5)

LANGTSÜNGLEN

1. An tetsü

- (5)

2. Juzüa senzüba shiruru

- (7)

3. Tamendakdak

- (4)

4. Tiak-asang

- (6)

7. Tasa

- (7)

8. Süngjang telung nung aliba

- (6)

10. Ibai masü

- (5)

11. Ano mamen

- (4)

OLONG PAITEP # 5755 TELANGZÜBA

TIPIEN :

1. Semtu, 3. Lepko, 5. Bilem, 8. Ulu,

10. Tsünpang, 11. Tesangwa,

13. Aoksa, 15. Putir, 16. Yipru.

LANGTSÜNGLEN :

1. Sayu, 2. Teb, 4. Kimong, 6. Lungkak,

7. Milak, 9. Zünga, 10. Temopu,

12. Walu, 14. Ali.



ALOKBA O KINUNGTSÜ NA X-RAY RESULT ATEMA DOCTOR DANGI AO.

Alokba : Tantsü...tanübo ni tokü baji shitak nung office ka nung tulur den ajuruteptsü. Anungji ibaji matongdang chiyungtsüsa yakta sorochiok demer chiyungdi no.

Warakla : Ayyaa...tambu na dang masü, nia tanübo kanga rongdak oset ka alitsü atema Bazar-i yakta aotsüla. Anungji ana külemi ilunga chiyunger aposodi. Tena prongla X-Ray report result atema Kasa Doctor dangi ao...Warakla Tama tonger Doctor-i la result rasaa shia lia Alokba-a tonga aru.

Doctor : Ayyaaaa...Anty kecha memeimshi-i dang indang-indanga shidi na nu menden nung komo tuluka lir... Yakta operation magira majungtsüa noo...!!! Waaooo...Uncle na-a mapang shitak nung tonga aruogo.... Na ya temesen o tebokpok ana prongla tagitsü malia...Yakta operation magira majungtsüa...!!!

Alokba : Waaooo...tantsü rongdak oset alitsüba Bazar -to yangi danga naa... ???!!!!

Warakla : Waamaa... tambu office nung tulur ajurutsüba-to yangi dang noo...???!!!!

Lilir : L.Kika Pongener.

TANÜBO NAI LANGZÜANG

Q. Mountain Sinabung metong tasazük ____ lir?

A. 2600m

B. 1600m

C. 600m

D. 3600m

===== (Taruba adok nung onoki langzüksü)

YASHI ADOK TELANGZÜBA : Odisha

AO OSHI ANGAZÜKDAK:

TANÜ ANGAZÜKTSÜBA OJANG



Aket

(v.) Meima benshi (like / favour)

* Kiburi Yosef dak kanga aket.

Aküt

(v.) Tepokpok nungi ola adoka tango endokba (Cough)

* Pa Covid-19 agi shiranger amato kanga aküt.

NAI-A YA METETTER MA?

FEBRUARY 2021' ITA SAYABA NÜNGTUGU KENSEP KAR:

- Foo Fighters - Medicine at Midnight
- Femi Kuti and Made Kuti - Legacy +
- Slowthai - TYRON
- Sia - Music: Songs From And Inspired By The Motion Picture
- Pale Waves - Who Am I?
- SG Lewis - Times
- Tash Sultana - Terra Firma
- Black Country, New Road: For the first time
- Sarah Mary Chadwick: Me And Ennui Are Friends, Baby
- The Staves: Good Woman
- The Weather Station: Ignorance
- Kizis: Tidibàbide / Turn
- Katy Kirby: Cool Dry Place
- Brijean: Feelings
- Cloud Nothings: The Shadow I Remember
- Julien Baker: Little Oblivions
- Nightshift: Zöe

SUDOKU # 5797

1			6			8		
					2	3		
	7	5			4			
			9	4		5		
5		2		3			9	
9	4	6	1	2			3	8
				7	9	6	8	4
7			8				5	3
						9		1

TELANGZÜBA # 5796

9	4	8	2	7	6	1	3	5
7	5	1	4	3	9	6	2	8
2	6	3	5	8	1	7	9	4
8	9	6	7	4	3	5	1	2
1	2	5	9	6	8	4	7	3
3	7	4	1	5	2	8	6	9
4	3	7	6	9	5	2	8	1
5	8	2	3	1	7	9	4	6
6	1	9	8	2	4	3	5	7

OJANG LUTEP # 5343

ISHÜKSATSHIA : SÜAM : NGDA : NGIBNUO : RCHTEBUI : ERKÜM : KIAJA : GUNA : SÜA : JUNGTABA :

OJANG LUTEP TELANGZÜBA # 5342

YONGPAK KA NUNG YONGSHILU AIKA ALUYONGJIA YONGKÜPBO
KA DANG ALIR

TAN HOPTA ATEMA - KOMA SÜLA ?

Q. Municipal aser Town Council nung tetsürtem menden asoshi menden 33% shiteta yutsütsü melena political party shia 33% tetsür candidate shim nunga koma süla?

Olong 20 shi nung March 19, 2021 tashi nung iba telangzüba ya onok dangi (e-mail - tiryimyim@gmail.com) :

(SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzubatemi taruba Honibarnü adoktsütsü.

Modi-i CM tem den Covid atema senden amen


New Delhi, Metsüremi/ March 17 (Agencies): Linük nung coronavirus wara ano tanaben prokba tangsa nokdangtsü atema tekaraba nung mera agia inyaktsüla, ta Bodhbarnü Ato kilonser, Narendra Modi-i metetdaksü.

Tang linük nung ano coronavirus wara tali prokba aser vaccine agütsüba onük nung o lemteptsü atema Modi-i Chief Minister tem den video conferencing ajanga senden mena liasü.

Taküm India nung coronavirus tashidak timtiba putetbaji tesüiba ghonda 24 tsüngda liasü, aser iba anogo nung Ato kilonseri senden ayonga amen.

January ita nunga Ato kilonseri coronavirus vaccination dak sendakba nung chief minister tem den senden mena liasü. Bodhbarnü senden nungbo West Bengal aser Chhattisgarh Chief Minister na maden.

"Asenoki coronavirus anema tongbang junga raraba agi temelung kanga lemer malitsüla. Asenoki



March 17, 2021 nü New Delhi nungi Ato kilonser, Narendra Modi-i video conferencing ajanga Chief Minister tem den coronavirus aser vaccination atema senden amenba noksa nung angur.

maoksatsüla saka iba tebilemtsü koktettsü atema inyaktsüla," ta pai ashi.

"Asenoki 'tendangba, contact tracing aser treatment ' inyakyim maneni benshitsüla. Asenoki akok tashi tashidak menaa alirtem contact tracing timtiba bushitsüla aser RT-PCR test rate ji shilem 70 dak tema südaksütsüla," ta pai ashi.

"Covid agi kongshiba linük aika nung tanabentaseben tashi iba tashidak asentenshir prokogo. Asen linük nunga state kar nungbo wara tensa tamajungba kümdar," ta pai ashi.

"Yimti tilatem nung akokba tashi nisung aika dak iba tashidak tendangtsüla. Yimti tilatem nung referral inyakyim aser ambulance network tajungba akümtsüla," ta paisa metetdaksü.

India nung tesüiba ghonda 24 tsüngda nisung 28,903 dak coronavirus putet aser ibaji 2021 küm anogo ka kija nung iba tashidak timtiba putetba anogo lir.

India nung nisung ajak agi 1,14,38,734 dak iba tashidak putetogo, aser iba tashidak agi nisung 1,59,044 süogo, ta Health Ministry data nung shia lir.

India nung Third Front ka nüngdaker: Sharad Pawar

New Delhi, March 17 (Agencies): Nationalist Congress Party (NCP) tongti, Sharad Pawar-i linük nung voters nem maongka agütsütsü atema Congress party medeni Third Front ka tentettsü atema tayongzükbaga agütsü.

Congress anema nokdaker PC Chacko-i Congress toktsür NCP nung adenba sülen osangbenertem den jembidang Maharashtra nung yimtenren tsütsü tain, Pawar-i, linük nung Third Front ka tentettsü atema yimtenren party balala den tang tejembidak lir, ta metetdaksü.

NCP tentetsang-isa, "Linük nüburtemi Third Front ka nüngdaker, aser iba Front tentettsü atema yimtenren party balala den jembidar. CPI-M tongti lenir, Sitaram Yechury-ia linük nung Third Front ka nüngdakba indang

lemsatepogo," ta metetdaksü.

Third Front nunggi regional party tem züngoktsü aser linük jenjang nung Sharad Pawar leniba nung iba Front tentettsü atema inyaker, ta NCP osang ka ajanga metetdaksü.

Sharad Pawar'er party NCP ya Maharashtra nung ruling Maha Vikas Aghadi (MVA) teloktep nung densema lir. Iba teloktep nung Shiv Sena aser Congress nata lir.

Ano Kerala nunga NCP ya Left teloktep nung dena lir. Iba dak alia Sharad Pawar-i Trinamool Congress tongti, Mamata Banerjee, Samajwadi Party aser Bahujan Samaj Party lenirtem dena-a tesendaktep tajung lir.

Third Front nung adentsü atema NCP-i Telangana Rashtra Samithi (TRS), JD-S aser YRSCP party tem danga

asüngdangtsü, ta NCP osang ka ajanga metetdaksü.

Linük nung aluyimertem longkak aitba, toktzü jenjang atuba, GST aser demonetization onüktem nung Centre nung Congress leniba nung opposition-i Narendra Modi-i aniba NDA sorkar anema nokdaker, ajisüaka opposition lenir aikati Rahul Gandhi-i aniba opposition agi melung masür.

2014 küm aser 2019 kü Lok Sabha election naprongla nung tongti opposition party (Congress)-i menden ishika nung dang takok angu.

West Bengal nung election agitsü mapang ana nung lia Sharad Pawar-i, tanü ama yimtenren tensa ka nung democratic party temibo Mamata-i aniba Trinamool Congress yaritsüla, ta ashi.

Mamata-i TMC Party manifesto saya

Kolkata, March 17 (Agencies): Bodhbar nikongdang 4:30 ako meta Trinamool Congress (TMC) Tir, Mamata Banerjee-i West Bengal Assembly elections atema party manifesto sayaago.

Chief Minister, Mamata Banerjee-i, lar sorkari mapa manguba tebilemtsü ajema kümdaksütsü aser kümshia mapa lakh 5 agütsütsü, ta nangzük.

Kolkata nung osangbenertem senden nung jembidang lai, "Onoki sorkar akümba sülen onoki nangzükba ajak inyakbaji nenok ajaki meteta dang lir. Onoki United Nations nungia award nguogo. Onoki sensak tia shilem 40 ajemtsüogo aser aluyimertem income asemsü agi timba kümtsüogo," ta metetdaksü.

Mamata-i, lar sorkari sorkar indang rations kishizüing tashi bener arutsütsü aser scheme ka kübok general caste beneficiaries nem küm shia sen 6,000 aser backward community

nem sen 12,000 agütsütsü, ta nangzük.

Mamata-i, "Tang aluyimertem nem teyari sen 6,000 agütsüdar saka küm shia ali acre shia sen 10,000 agütsütsü; temaba shisaliok bushir kaketshirtem nem sen lakh 10 tashi indang credit card agütsütsü aser sen tetemlok 4% dang agitsü," ta ashi.

"Iba ya yimtenren manifesto ka masü saka terenlok nung ajemdaker renemba manifesto lir. Iba manifesto ya nüburtemi indang, nüburtem atema aser nüburtemi yangluba lir," ta lai ashi.

Taruba election nung Mamata-i Nandigram menden nungi taoba mapang lar party nung lenir aser tawa BJP nung adensang, Suvendu Adhikari den tokteptsü.

West Bengal nung assembly menden 294 atema March 27 nungi tenzüka shilem ti lemsar election agitsü aser May 2 nü vote zünga election osang sangdongtsü.



New Delhi, March 17, 2021: Delhi LG nem tashi tulu agütsütsü atema Centre sorkari bill ka benokba anema Bodhbarnü Jantar Mantar nung Delhi Environment Minister, Gopal Rai leniba nung AAP lenirtemi longkak aitba noksa nung angur.

BJP MP Ram Swaroop Sharma Delhi nung par kidang sür angu

New Delhi, March 17 (Agencies): Bodhbar anepdang BJP MP Ram Swaroop Sharma, Delhi nung pa kidang takdang ka nung sür lia angu; police-ibo pa soseta asütsü asütsüa akok ta bilema postmortem agitsü atema pa tasü mang bener ogo.

Bodhbarnep BJP Parliamentary Party senden amentsü sentong liasü, ajisüaka party MP asüba osang angashiba sülen senden thinen.

Osangbener den jembidang Delhi Police PRO, Chinmoy Biswal-i ashiba agi, Sharma ji tsüngbang nung pangka nungi lisü agi tekong nung alenseter lia angu, iba sülen pa hospital-i anir ao saka doctor-i pa süogo, ta metetdaksü.

Arrshi küm 62, Sharma ya temang nung timtem aika liasü. Mezüng bushisüngdang ajanga pa soseta asü asütsüa akok ta bilemer; pa takdang nung soseta asüba shidibo

maliasü.

Asür nem akhüm agüja Lok Sabha senden nikongdang 1:00 ako tashi thinena liasü aser nikongdang Lok Sabha nung MP temi asür nem akhüm agütsü.

Sharma ya 1958 küm June 10 nü Mandi district kübok Jalpehar yimdak aso aser pa anaben tashi MP inyakogo.

2014 aser 2019 küm Lok Sabha election naprongla nung pai Mandi Parliamentary constituency nungi toktepa takok ngua liasü.

Taküm February ita nunga Union Territory of Dadra & Nagar Haveli (DNH) nungi MP, Mohan Delkar (arrshi küm 58) Mumbai nung aliba hotel ka nung soseta sür lia angu. Pai soseta asüba shidi ka tokja liasü, aser iba shidi nunggi pai yimtenren lenir ka densema ketdangser aikati pa nem timtem agütsüba agi pa soseta asü, ta shia lir.



New Delhi, March 17, 2021: Bodhbarnü Lok Sabha nung Budget senden amendang MP temi Mandi nungi BJP MP, asür Ram Swaroop Sharma nem akhüm agütsüadang tangokba noksa nung angur. Bodhbarnep Delhi nung MP, Sharma par kidang sür lia angu.

Myanmar Buddhist teloki ketdangsürtem den pilar

Naypyitaw, Metsüremi/ March 17 (Agencies): Myanmar nung tashi tulutiba Buddhist monks' association ajanga mitkar yimsüsürtem dang longkak aiter anema azüdokshiba anentsü ashi aser taoba ita tashiyim agi sorkar atsüngdokba sülen prangbong bena alir telok tilabai tai maket civilian tem reshikangshir aser tepseter, ta tai tongloksü, ta Bodhbarnü osangtem ajanga ashi.

Mitkartemi democracy busema longkak aiter anema azüdokshiba aija sangdongba mapang, sorkari shima aliba tentet yagi longkak aita inyaksangshi ajak anentaü tejangraba metetdaksü.

Brehostibarnü religious affairs minister den shisa agitepba sülen State Sangha Maha Nayaka Committee ajanga sangtong tatembang ka sangdongtsü sentong lir, ta Myanmar Now news portal ajanga ashi.

Myanmar nung mapang talangka nungi monk temi linük melenshitsü asoshi shilem tulu agia arur aser 2007 küm mitkari yimsüsüba anema "Saffron Revolution" alidanga parnok yakbang sür nokdaka

liasü.

Iba committee züingsemtem nungi telangzüba agüja mali, saka parnoki sangdongba ama nokdakra, sorkar den külemi inyaka aruba telok aser ketdangsür tsüngta mangatetep adoktsü.

Mitkartemi February 1 nü Aung San Suu Kyi'er sorkar atsüngdoka la aser lar party züingsemtem apuba sülen Myanmar nung rongrong tulu adoka lir, aser linük aikati mitkar lenirtem aitsür.

Atsüngdoker aliba parliament züingsemtem, talisa Suu Kyi'er telok nungi parliament züingsemtemi kin balala aliba linük nung mitkari tashiyim amshia sorkar atsüngdokba anema lungjemer nokdaksü ajungshir, aser kiralongrartem tenüing ya democracy asoshi raraba tesemtem nungi agentsü, ta ashir.

Security forces temi longkak aiter madak takok angutsü merangba mapang longkak aiter nisung 180 dak tema tepsetogo, ta Assistance Association for Political Prisoners activist group ajanga ashi.

Yangon yimti nung longkak aiter aser security forces tem

raratepa liasü. Iba mapang police temi injang khaloktsü aser nisung ka tekolak nung khashiba amai social media nung nguogo.

Bodhbarnüa longkak aiter noklang aika longkak aitba temaitsütem bener anüdoklen Demoso, Irrawaddy ayong anasa Pathein aser south tsütsü Dawei nung adenshia liasü.

Mandalay yimti aser Monywa jila nunga longkak aitba osangtem lir.

Tesem ajunga nung mobile internet shibangba ajanga longkak aitertem osang agiteptsü aser osang jangjateptsü tasak akum. Myanmar nung nisung kar dang Wi-Fi amshir.

"Onoki akhi yimya nung osangtem agitep. Onoki guerrilla protest system amshi. Sepaitem arudang onoki nüburtem dang pakshitsü ashi...anungji rongrong madok saka onoki inyaktsü akokba inyaktet," ta longkak aiter kati ashi.

Myanmar nung aliba UN nungi bushisüngdanger temi nüburtem dang mitkartemi mapa tamajung inyakba kulitem bendena mesamai ayutsü ayongzü.

US nung spa asem nung nisung ti khaset

Atlanta, Metsüremi/ March 17 (Agencies): United States kübok Georgia state nung spa asem nung Mongulbarnü injang agi Asia tsür timba sür nisung ti khaset, aser iba maparen nung temolung melemi arishi küm 21 tain temesüing nisung ka pua lir, ta police-i ashi.

Kin anema mapa tamajung inyakba tang tali akumba ajanga Asian American nisungtem tetsübu nung alidang iba lendong ya ataloker, aser Asia nungeri lapoka aliba business nung kongshitsü tsübur.

Georgia yimtiba, Atlanta kübok Acworth anasa Young's Asian Massage nung nisung pezü tepset, ta Atlanta Journal-Constitution osangkaket ajanga ashi.

Cherokee County sheriff indang office nungi Captain Jay Baker-i osangkaket dang ashiba agi, asürtem ya Asia tsür ana, temesüing nisung tetsür ana aser tebur ka, aser Hispanic kin nungia tebur ka yiru.

Northeast Atlanta nunga Gold Massage Spa aser Aroma Therapy spa nung tetsür pezü sür lia angu, ta Atlanta police department ajanga ashi.

Atlanta nung asür ajak ya Asia tsürtem liasü, ta police temi Atlanta Journal-Constitution dang ashi.

Tesem asem nung nisung dak injang khaloktsüba asoshi Robert Aaron Long dak temolung melemi lir, ta ketdangsürtemi ashi.

Lendong atalokba tesemtem nungi surveillance video nung ajemdaker, "Cherokee County nung temolung melemeti alisang yagi tanüingba tesem nunga lendong ya agütsü ta amanger, shiba onok ket nung lir," ta ashi.

"Lendong ajunga ya sendaktepa alitsü südi ta imlaa jangjatepba mapang lir," ta pai ashi.

Atlanta nungi mile 150 shi pilar Long ya apu, ta Georgia Department of Safety ajanga Facebook nung sangdong.

"Ketdangsürtem lendong atalokba tesem tonga arudang tetsür asem injang agi yirur asüba ama liasü. Police dang lenmang tezülen injang ola angashi ta ashi aser yangji tetsür pezübuba sür lia angu," ta city police department ajanga northeast Atlanta nung atalokba indang ashi.

Federal Bureau of Investigation ajanga bushisüngdangba nung

yariteper, ta odongtar kati ashi.

Asür tetsür pezü Korea nungi jakzükbata police nungi osang tejangja Atlanta nung aliba diplomat nem agütsüogo, ta South Korea indang Foreign Ministry ajanga ashi.

Tawa Asian-Americas tem dak timtem agütsüba osangtem tali angashir, talisa COVID-19 tashidak wara adokba sülen taoba Tir Donald Trump aser dangartemi coronavirus ya "China nunger virus" ta jembia liasü.

Georgia nung atalokba den tesendaktep meliaka New York nung asen Asia nungertem alidak sepaitem yoka tanükba agütsür, ta New York police department indang counterterrorism bureau ajanga ashi.

New York aser Los Angeles densema US nung yimti tulu 16 nung taoba küm Asia nunger anema mapa tamajung inyakba asemsü agi timba kuma 49 nungi 122 akum, ta CSU San Bernardino nung Center for the Study of Hate and Extremism ajanga bushitet.

Georgia nung Asia nunger nisung 500,000 mesüra yangji aliba nütsüing yongsük shilem pezü shi lir, ta Asian American Advocacy Fund ajanga ashir.

Georgia nung aliba Democratic party ajanga Mongulbarnü lendong ya tetsübutsü ka lir, ta ashi.

"Tejangja temai maneni adokba mapang, tesusatsüka iba ama Asian American nunger temi ajangshiba tang tashidak wara agi tesem ajunga sünger lia tali ajangshir," ta Congresswoman Nikema Williams-i ashi.

"Tanü #Atlanta nung lendong atalokba ajanga asenok mera agishia America nunger tajemzükbata jenjang nung alir ajunga racism nungi kumzüka ayutsü nüngdak ta sayur," ta Ben Crump-i tweet ka nung ashi. Ben Crump ya okatsür ka lir, shibai küm ishika tsüngta United States nung police temi tashiyim amshia sentsü tanak nisung tepsetba asoshi okatsür ka lir.

Taoba Brehostibarnü linük den jembiba mapang, Asian American tem anema tim masüba mapa inyakba, merenshia amshiba aser tenüing asenba asoshi Tir Joe Biden-i aija liasü.

"Ibai tai lir. Ibai America nunger yimya masü. Aser ibai anentsüla," ta pai ashi.

Chile nung mozü agüjaka COVID cases tali akumer

Santiago, Metsüremi/March 17 (Agencies): Chile nung nütsüing yongsük shilem asem kuma lemsar shilem ka dak tema nem mozü agüjaka iba Latin America linük nung coronavirus tashidak wara wave tanabuba agi kangshir, koba mezüingbuba dang nungi kanga agi tesashiba lir.

Iba linük nung tesüiba anogo tenet nung anogoshi COVID-19 tashidak ya nisung 5,000 dak tema dak puteta arur aser linük nung COVID-19 cases ajak senteper shilem 44

bo linük yimtiba, Santiago aliba Metropolitan region nungi lir.

Chile nung iba virus yagi nisung 21,000 dak tema takum agiogo aser nisung 900,000 dak tema menepogo, koba agi alima nung nisung million 2.6 taküm samaja lir.

Santiago nung Indisa clinic indang intensive care unit ketdangsür Dr. Sebastian Ugarte-i ashiba agi, tan hopta critical care unit anasü agi timba kumaka yipten agi shiranger matar.

"Arishi küm 70 dak tema alirtem, shirnok mozü agir lir, parnok emergency room nungi samaogo. Tang lanurtem timba shiranger," ta Ugarte-i osangbener dang Bodhbarnü ashi.

February ita nungi tenzüka iba linük nung vaccination campaign agiba ama alima nung danga linük katia agia tashinung nübur million pongu nem COVID-19 mozü agütsütsü nükjidong yua lir.

Chile nung taoba küm tatemlen nungi front-line health worker nem iba mozü ya agütsü tenzüka aser February ita nungi tenzüka China-i yangluba Sinovac mozü ya teintet rogo aser tongtipang mapa inyaker nem agüja arur.

Nütsüing yongsük million 18 dak tema aliba linük nung shilem 33 dak tema nem iba mozü ya khen mesüra anaben agüja lir, anungji alima nung mozü timtiba agütsüba linüktem rongnung densema lir. Ajisüaka anogosji Chile nung nüburtem anepbong nungi mozü agitsü atateper.

Herd immunity ajanga mapa inyaktsü atema Chile nübur shilem 80 bo mozü ya aginung dang ajungtsü, ta health ketdangsürtemi ashi, koba ano ita asem nunga mawajemtettsü.



Israel-i occupied West Bank nung aliba Bethlehem nem coronavirus mozü agütsüba sülen Palestinian health worker ka iba mozü agiba noksa nung angur. Palestinian Authority (PA) ajanga global COVAX sharing initiative nungi COVID-19 mozü batch mezüingbuba Bodhbarnü agizükogo. Deobarnü tashinung Pfizer-BioNTech mozü doses 38,000 amshitsü aser Oxford-AstraZeneca indang doses 24,000 yabo World Health Organization ajanga telemtetba ka magi tashi rizünga yua atatsü, ta Palestinian health ministry odongtar kai ashi.

Redmi Smart TV X-Series India nung sayaogo

Metsüremi/March 17, 2021 (Agencies): Redmi Smart TV X-series kong Redmi Smart TV X50, X55, aser X65 densema lir iba series ya India nung sayaogo. Model asemprongla nung specifications kasashi dang ajisüaka screen size balala asütsü.

Redmi Smart TV X-series ya India nung Xiaomi sub-brand Redmi indang mezüngbuba smart TV model asütsü. Company yagi taoba mapang nungi China nungbo smart TV units tem yoka arudar. Redmi TV models nung tongtibang features tem rongnung 4K HDR-enabled display panel, 12-bit Dolby Vision format support aser Android TV 10-based PatchWall UI densema lir. TV tasentem ya Amazon-Croma, Realme, OnePlus, aser TCL-i agütsüba jenjang dalam 4K TV tem den toktepsü.

Redmi Smart TV X-series ya size asem nung angutsü aser India nung X50 sen 32,999, X55 sen 38,999 aser top-end X65 variant sen 57,999 agi angutsü.

Model tasentem ya kasa size nung 4K TV ayokertem dang nungi dalangba. Croma Fire TV Edition Smart LED TV, 43-inch Ultra-HD model jenjang sen 34,999 lir aser kasa mapang nung TCL-ia, India nung mezüngbuba Android 11" enabled TCL P725 series 43-inch base variant sen 41,990 aser 50-inch variant sen 56,990 agi sayaogo. Maneni Redmi Smart TV X-series ya Amazon aser official Xiaomi channel tem nung March 26 nü nungi ayok tenzüksü. ICICI Bank credit card amshia TV alirtem dang sen 2000 tajemba meshitsü.

Specifications dak sendakba nung Redmi Smart TV nung Dolby Vision and HDR10+ formats keta lir. Redmi company-i ashiba agi, TV nung smooth, blur-free video quality agütsütsü atema 'Reality Flow' display ka inokja lir. Redmi TV tem nung ano Vivid Picture Engine, in-house image processing algorithm keta lir. Maneni Redmi TV X-series nung

64-bit quad-core Mediatek processor CPU, Mali G52 MP2 GPU, 2GB RAM aser 16GB onboard storage inokja aliba angutsü.

TV nung Android TV 10-based PatchWall keta aliba ajanga universal search, kids mode, smart-recommendation, built-in Chromecast aser Mi Home App support asütsü. Mi Home app ajanga tamshirtemi IoT products ajak azüoka asadangtetsü aser pei TV nungi dang tesendaktep tajung ajangshitsü. Audio dak sendakba nung Redmi Smart TV X-series ajanga 30W audio output agütsütsü aser Dolby Audio formats dena support asütsü.

Connectivity tsütsü option tem rongnung HDMI 2.1 ports den supporting eARC ka, USB ports ana, dual-band Wi-Fi, optical aser 3.5mm audio jack, aser Bluetooth v5.0 densema lir. Shisema aliba ama display panels ajak nung 4K Ultra-HD (3,840 x 2×160 pixels) resolution keta lir.

Sonic The Hedgehog 2' maparen tenzükogo

New York, Metsüremi/March 17, 2021 (Agencies): Sonic the Hedgehog ola agütsüsang Ben Schwartz aser Doctor Robotnik ama Jim Carrey shilem agiba film indang sequel maparen tenzükogo.

Iba sequel dak sendakba nung director Jeff Fowler-i osang kar lemsatepa liasü.

Twitter ajanga Jeff-i, "Lights, camera, hedgehog. Sonic the Hedgehog 2 atema production maparen tanü nungi tenzükogo! #SonicMovie2," ta

lemsatep.

Iba blockbuster sequel nung Schwartz aser Carrey nati tanaben pei tata shilem agitsü. Kasa project nung James Marsden aser Tika Sumpter nati Tom aser Maddie Wachowski ama shilem agiba angutsü.

Alima ajunga box office nungi iba film ajanga million dollar 319 aazükba sülen, Sonic ola agütsüsang, Schwartz-i iba film den tatongtep ka yanglutsü asoshi teimla aliba lemsatep.

"Box office nung takok

tajung anguba asoshi sequel yanglutsü maongka angutsü ta kü dak teimla liasü. Kasa mapang, Jeff-i ano iba film den tesendaktep project ka yanglura iba maparen tajung asütsü," ta Schwartz-i ashi.

'Sonic the Hedgehog 2' nung ano Tails' ta nüngja agütsüba character tasen ka angutsü. Iba feature film nungbo Tails-i mezüng shilem agir alitsü.

Iba film sequel production maparen dak alaka, film sayatsü atema anogo osang magütsü.

SÜR KÜM KA AJUNGER



LT. T. TEKACHUBA JAMIR (KHAR)
9/10/1954 – 18/03/2020

Mangur aser mangashir, saka teti anasa.

Na akümlir rongnung lishibato temoatsü, ne mapatem senti.

Tebang agi meshiteti onoki na meimer, Masadangteti menungrar.

- Temeim kinungtsü, jabasotem aser kinungertem

KANGA MOLUNG ACHIR



Late. TALITULA
Molungkimong
Tasoba 1922
Tasüba 09/03/2021

Onoki onsara meima aliba Ojala **Lt. Talitula Longchalar** Molungkimong Lt. Ozunglemba Tzudir kinungtsü, Oja na küm 99 tashi onok den akümdong tajungtiba süa liogo, nü yimya liro tajung tem kodanga mamatsü, mapang tatsüka shiranga alidang aser tasünü tashi kija aser lokti balala shirnokisa nübu, rongsen agi nongita yariogo, onok tsüngtong maruteter, nenok ajak dang kümremi pelaba iba osang kakat ajanga lemsateper.

Takar Tsüngremi nenok ajak moajangma ta ozüi sarasademtsür.

- Temeim Chirnur, Mezüng, Tanabuba Semchirtem aser Anükapang

IN THE COURT PRINCIPAL DISTRICT & SESSIONS JUDGE MOKOKCHUNG : NAGALAND NOTICE

NOTICE INVITING CLAIMS/OBJECTIONS OF OTHER CLAIMANT(S) FOR ISSUE OF SUCCESSION CERTIFICATE UNDER PART-1 OF INDIAN SUCCESSION ACT 1925 S/C NO. 38/2021

Whereas application under Succession Act 1925 for grant of Succession Certificate for the estate/pension benefits of late Tongpangkoka has been applied by Smti. Y.Amenla Imsong D/o Lt. Tongpangkoka R/O H.N 16 Tuliyoung Ward, Tuli, Mkg Nagaland for possession of Closing of A/C 11792586589

Notice is hereby given that any person having interest in the administration of the estate/pension benefits of the said deceased may if she/he so desire appear in this court on or before the said day of 16.4.2021

Given under the hand and seal of the court on this the 16.3.2021

Sd/-

**Principal District & Sessions Judge
Mokokchung : Nagaland.**

KEN COPYRIGHT NUNG AIBELENBA AJANGA TATOK MESHIR

Ao Musical Revival Volume 2 nung aliba 'Mangko nang Tsungkum' iba ken ya kanga ajungba agi ni medemer kar den whatsapp nung lemsatep. Saka tesülenang ni iba ken adoka aliba ya shinga copy süa mamshitsü ta angu. Anungji iba ken prokshibaji ni tai ta ni meyipa agir (Apology). Aser iba ken kiburi kechi fine meshidir ni agütsütsü merangtsü.



Bendang, Dimapur

In the court of Principal District & Sessions Judge Mokokchung : Nagaland

NOTICE

(Section 10 of Guardianship and Ward Act)

Whereas an application under the Guardianship and Ward Act has been filed by Rongsenpokba for appointment of Guardian in respect of minor(S) Mr. Imtimaong Pongener before the court and whereas the day of 17.4.2021 has been fixed for the hearing on the matter.

Notice is hereby given inviting objection if any from the person having interest in the above minor(S) to be furnished on or before the fixed date/or appear in person.

Given under any hand and seal of the court on this 17 March 2021.

Sd/-

**Principal
District and sessions Judge
Mokokchung.**



#LargestVaccineDrive



COVID-19 vaccination is now available for citizens above 60 years of age and those between 45-60 with specified co-morbidities like diabetes, hypertension etc.

Why do we need the vaccine?

- ✚ To protect ourself against COVID-19
- ✚ To protect those around us
- ✚ It's a safer way to help build protection
- ✚ Vaccination is an important tool to help stop the pandemic.

GET YOURSELF REGISTERED FOR THE VACCINE TODAY!

**Always follow COVID-19 Appropriate Behaviors even after vaccination;
Wash Hands, Wear Mask and Maintain Distance.**

State Health Helpline: 1800-345-0019; National Toll Free: 1075

Arkong aser Artang na semi final tongogo

MOKOKCHUNG INTER-WARD FOOTBALL TOURNAMENT



Tongdentsüyong aser Arkong ward na penalty metsütepba mapang tangokba noksa nung angur.

Mokokchung, March 17 (TYO): March 17 nü 2nd Mokokchung Inter-ward football tournament 3rd quarter final match Arkong Ward o Tongdentsüyong ward na Imkongmeren Sports Complex nung asayaba, Arkong Ward-i penalty shootout nung goal 6-5 agi Tongdentsüyong madak takok tulu ngua parnok semifinal-i igo.

4th quarter final match Artang Ward o Alempang Ward na asayaba, Artang Ward-i goal 2-1 agi koka parnoka semi final asayatsü jenjang ajangzükogo.

Tanü mezüng match

Tongdentsüyong o Arkong na asayaba, lemzüksüba mapang ajak tembang tashi nung shingaia goal kata magütsütet. Anungji, tie-break mesayaidang indangindang penalty metsütep aser iba nungji Arkong Ward-i goal 6-5 agi akok.

Tanabuba asaya Artang o Alempang tsüngda asayadang, asaya tenzüker minute 8 dang or lia Artang nungi Jersey No. 8 - Supongmeren-i par telok atema goal ka metsüoktsü. Aji saka, iba goal ji minute 26 nung Alempang nungi Jersey No. 9 - Lipoktoshi-i küptok

aser mezüng asaya tesadang kaji goal kasasa nung tembang.

Tanabuba asaya tesadang nung Artang nungi Jersey No. 9 - Temshi Imchen-i D-Box telung nungi goal tajung ka idaktsü aser iba goal ji Alempang puri meküptokteti asaya ketdangsür (referee)-i match tembangba pio (whistle) apuloktsü.

March 18 nü mezüng semi final match Penli Ward o Mongsenbai Ward na nikong 1:00 ako nungi asayatsü aser tanabuba semi final match ji Artang Ward o Arkong Ward na nikong 2:30 ako nungi tenzüka asayatsü.

Sumi Hoho asayamung tenzükögo

Dimapur, Metsüremi/March 17 (TYO): Eastern Sumi Sports Association-i ayongzüka Aghunato jila nung March 17 nü 13buba Sumi Hoho Trophy tenzükögo. Asayamung lapokba sentong nung Advisor, F&CS, Legal Metrology & Consumer Protection and Taxes, Pukhayi Sumi alakteta jaoker liasü.

Sentong nung o jembiba mapang Pukhayi Sumi-i lanurtem dang parnok senpet tajungtiba nung amshitsü ajungshiba den saisapong ajanga tali longjemshitsü ayongzük. Paisa sentepa aliba

lokli dang pei nükjidong dak rangloker alitsü aser tetoktepba lima ka nung saisapong koda tongtibang iba indang jembiba liasü.

Alakteta jaokerisa asayamung wako salaja liasü, maneni SGS tir P.Akihito Zhimomi aser tir A. Tokiho Assumi nati o tatsüsü jembiba. Sentong nungsa Sumi Leku Khetoi-i ken ka aten aser Lukikhe-Shevishe-i sobaliba tsüngsang sayaa liasü. Asayamung nung shilem agirtem nangzüktepba sentong Sports Secretary lenisüba kübok agi.

Euro 2020 yimti 12 nung asayatsü

Metsüremi/March 17, 2021 (Agencies): Taoba küm asayatsü aliba Euro 2020 koba Covid wara poktetba atema küm ka thinena liasü, iba asayamung ya Covid-19 wara süshia moi liaka Europe kübok yimti 12 nung asayatsü.

European football governing body UEFA executive committee züngsem kati ashiba agi, taoba mapang sentong yanglur aliba ama iba asayamung yimti 12 nung asayatsü bilemdar.

"Asayamung asayaba yimya nungi masetshitsü

nükjidong lir," ta German federation (DFB) tatong tir Rainer Koch-i ashiba Xinhua news agency sangdong ka ajanga metetdaksü.

Paisa, tatembangbuba olen lemsateptsü atema ano kerara ta ashi, ajisüaka pai vaccine dak tamang akaba lemsatepogo, koba hopta ka ana tsüngda tashi taitba akümtsü.

Euro 2020 ya küm ka agi thinenba sülen taküm June 11 nungi tenzüksü aser July 11 nü tembangtsü sentong lir.

India nunger asayatem All England Championships nung shilem agitettsü

Metsüremi/March 17, 2021 (Agencies): India nunger badminton asayatem All England Championships nung shilem agitsü atema temelaba nguogo. Taoba mapang COVID-19 tashidak potetertem tanaben tendangshiba sülen tashidak mali ta jangjaogo, ta BWF-i Bodhbarnü metetdaksü.

Mongolbarnü India nunger asayar asem aser staff ka dak tashidak potet aser ano kar tetendangba osang ataa liasü aser iba ajanga asayamung metenzük tsüngda asayatem kangabo masayashi liasü.

"Team nung nisung ka dak danga tashidak mepotet. Onok All England asayamung atema renema lir," ta India indang Danish foreign coach Mathais Boe-i Instagram nung lemsatep.

Boshibarnü team manager tem dangi email ka ajanga Badminton World Federation (BWF) aser Badminton England-i, "bushitsüngdang maneni agiba den tashidak tendangshiba sülen tashidak mepotet aser team nung team züngsem ajanga draw nung züngoksemogo," ta ashi.

M Sreeshankar Olympics atema qualify süogo

Metsüremi/March 17, 2021 (Agencies): Long jumper Murli Sreeshankar Mongolbarnü Tokyo Olympics atema qualify süogo. Federation Cup Senior National Athletics Championships nung pai pa indang national record ajateta 8.26m ajokba sülen Olympic atema qualifyasü. Tebur long jump atema Olympics qualification mark ji 8.22m lir.

Arishi küm 21 tain Kerala nungi asayar yagi pongubenbuba merangdangba mapang 8.26m joka pai 2018 küm 8.20m joka national record yanglur aliba ajatet.

Kerala nungisa

Muhammed Anees Yahiya (8m) aser Karnataka nungi S Lokesh (7.60m) nati silver aser bronze medal angu.

Race walker tem rongnung KT Irfan, Sandeep Kumar aser Rahul Rohilla nunger tebur 20km asaya atema aser tetsür 20km asaya atema Bhawana Jat aser Priyanka Goswami nungera Olympic asoshi qualify süogo. Maneni javelin aoner Neeraj Chopra aser Shivpal Singh na, tebur 3000m steeplechase asayar Avinash Sable aser mixed 4x400m relay team taoba mapang Tokyo Olympics atema qualify süadokogo.

Zlatan Ibrahimovic Sweden squad-i meyipa aruogo

Metsüremi/March 17, 2021 (Agencies): Küm pongu shi international football asaya nungi pilaa aliba sülen Zlatan Ibrahimovic tanaben meyipa aruogo aser pai pa yimya nung Mongolbarnü pa meyipa aruba sangdonga liasü.

Arishi küm 39buba nung taruba World Cup qualifiers atema Sweden team nung shimokba sülen "Tsüngrem tanaben meyipa aruogo," ta pai social media nung pa sülen anidaker million aiken nem metetdaksü.

Ibrahimovic-i Sweden team nungi 112 ben asayaba nung goal 62 idakja otsü tasen yanglur lir. Pa 2016 European Championship sülen international asaya nungi anen saka pai Manchester United, Los Angeles Galaxy, aser AC Milan nungi kanga junga asayaogo.

November ita sentong ka nung pa nem Sweden's men's player of the year naroküm 12benbuba agütsü aser iba mapang Ibrahimovic-i Sweden coach Janne Andersson dang pa taneben national team nung adentsü janrar ta ashi. Sensaksem aika agiba sülen Andersson-i pa tanaben anioktsü telemtetba agi.

Tang atemabo Ibrahimovic, taküm June aser July ita asayatsü aliba Euros tashidang asayatsü

renema lir. Pa Qatar 2022 World Cup tashi asayatetsü masayatetsü mejangja. Qatar nung WC asayaba mapang pa arishi küm 41 junger alitsü.

"Ni tang yanglur aliba team ya küm 4 ser tesadang asayatsü atema renema lir anungji pa iba telok nung tasen asütsü. Pa taruba hopta mezüngbuba onok den longjemtsü," ta Andersson-i ashi.

"Pa onok inyakyim aser asaya yimya nung asayatsü akümtsü. Pai taoba mapanga inyakateta aruogo; pa taoba mapanga club aika melechia asayaogo. Iba ya teblemtsüka masütsü," ta paisa ashi.

Ibrahimovic asaya nungi anenba sülen Sweden team asayamung tongtibangtem rongnung Russia nung 2018 küm World Cup nung dang quarterfinals tonga asayaogo, koba 1994 küm sülen tajungtiba asayaba liasü.

Andersson indang team ya kanga meranga inyakba team ka lir, kong asayar ka danga tangar dak nungi alakteta tajungba mali. Taoba mapang Sweden indang asaya yimya Ibrahimovic teyongtsü ser yanglua liasü.

Ibrahimovic yimya agi squad

minporngsü akok ta shisabulua bilemba Andersson-i agintsüogo.

"Ni iba atema kecha shisabulua mali. Zlatan küna iba indang sensaksemogo. Pa ji pa aser kasü ka nungbo pa koma yamaji dang asütsüla.

"Ajisüaka pa kanga dang asayar tajung ka lir aser tajangshiba aika bena lir, koba team nung benoka amshitetsü. Onoki koda inyaksü iba indang aser national team nung koda inyaksü iba indang jembir aser pai pa asayaba yimya ajanga onok asaya yimya nung talila ka bendenloktsütsü," ta Andersson-i ashi.

World Cup qualifiers nung Sweden March 25 nü Georgia den aser anogo asem lir Kosovo den asayatsü. Ano March 31 nü Estonia den friendly asaya ka asayatsü.

Item asaya ka nung danga Ibrahimovic asayara pa Sweden national team puti otsü nung asayar tambusang akümtsü.

Iba season Milan nungi asaya 21 nung pai goal 12 idaktsü lir. Euro asaya nung Spain, Poland aser Slovakia den Sweden ataa lir.

BILEMDANGANG

"Kong temulungtetba lir idakji takok lir."